

Ein ander Geistlich lied / nach vorhergehender
Melodia vnd Composition.

H E R R E Gott / dein Göttlich wort / ist lang vertunckelt
blieben / bis durch dein gnad / vns ist gesagt / was Paulus
hat geschrieben / vnd andere Apostel mehr / aus dem Gött-
lichen munde. Des danckn wir dir / mit fleiß / das wir / erlebet han
die stunde.

Das es mit macht / an tag ist bracht / wie klerlich ist für au-
gen. Ach Gott mein HErr / erbarm dich der / die dich noch jetzt ver-
leugnen / vnd achten sehr / auff menschen lehr / darin sie doch ver-
derben. Deins worts verstand / mach ihn bekand / das sie nicht
ewig sterben.

Wiltu nu sein / gut Christen sein / so mustu ersilich gleuben /
setz dein vertrau / darauff fest bau / Hoffnung vnd lieb im Glau-
ben / allein durch Christ / zu aller frist / dein nechsten lieb darneben /
das gewissen frey / rein Hertz dabey / das kein Creatur kan geben.

Allein HErr du / must solches thun / doch gar aus lautern
gnaden / Wer sich des tröst / der ist erlöst / vnd kan ihm niemand
schaden. Ob wolten gleich / Papst / Kenser / Reich / sie vnd dein
wort vertreiben / ist doch ihr macht / gegen dir nichts geacht / sie
werdens wol lassen bleiben.

Hilff HErrre Gott / in dieser noth / das sich auch die bekeh-
ren / die nichts betrachten / dein wort verachten / vnd wollens auch
nicht lehren. Sie sprechen schlecht / es sey nicht recht / vnd ha-
bens nie gelesen / auch nie gehört / das edle wort / istis nicht ein
Teufflisch wesen?